

Meeqcat tapersorsorneqarnissaannut Inatsisartut inatsisaat

Kapitali 1

Aalajangersakkat aallarniutaasut

§ 1. Inatsisartut inatsisaat meeqqanut inuuusuttunullu illersuinermut ikorsiinermullu atorneqassaaq, meeqqat inuuniarnermikkut atugarliortut imaluunniit immikkut pisariaqartitsisut immikkut siunnerfigalugit. Inatsisartut inatsisaat manna naapertorlugu ikorsiinerup siunertaraa meeqqat pisinnaatitaaffisa qulakkeernissaat, kiisalu meeqqat inuuniarnermikkut atugarliortut imaluunniit immikkut pisariaqartitsisut ukioqatistik assigalugit inuttut ineriertornissaminnut, ingerlalluarnissaminnut, peqqissuunissaminnut aammalu inersimasutut inuunerminni nammineersinnaasutut periarfissaqarnissaat anguniarlugu.

§ 2. Inatsisartut inatsisaat una malillugu aalajangiinerit meeqqamut ajunnginnerpaasussaq aallaavigalugu aalajangiinerusassapput.

Imm. 2. Meeqqamut tunngasuni pissutsini tamani meeqqap nammineq isumai pingaartinneqassapput aamma meeqqap ukiuinut perorsimassusianullu pissusissamisoortumik eqqarsaatiginnittoqassalluni.

§ 3. Kommunalbestyrelse iliuuseqarnermigut paasinianertermigullu pisariaqassappallu Inatsisartut Inatsisaat una naapertorlugu ikorsiinissamut neqerooruteqarnermi meeqqap kialuunniit alliartorneranut uku aallaavigalugit peqataassaaq:

- 1) atugarissaarnissaanut, peqqissuunissaanut ineriertornissaanullu,
- 2) toqqisisimanartumi isumassuinikkut avatangiiseqarnissaanut,
- 3) inersimasunut, ilaqtutanut inuttullu attaveqartarfinut toqqisisimanartumik aalajaatsumillu attavissaqartuarnissaanut,
- 4) inersimasutut nammineersinnaassuseqarluni inuunerup angujartornissaata ilinniarnerani inuttullu ineriertornerani tatiginartunik sinaakkuteqarnissaanut.

Imm. 2. Meeqqap inuunerani pissutsit ataatsimut isigineqassapput sapinngisamillu siusissukkut tapersorsorneqassalluni.

Imm. 3. Kommunalbestyrelse meeqqanut inuuusuttunullu ataqtigiissumik ilusilersukkamik kiisalu meeqqanik sumiginnaanermik pinaveersaartitsinermut piareersimasortalimmik siusissukkut paasiaqartarnissamut meeqqallu sumiginnakkat pillugit sulianik suliarinnittarnermut upalungaarsimasussanik, kiisalu ajornartoornermi upalungaarsimanissamik periusissiussalluni meeqqamik angerlarsimaffiup avataanut inissiinissap tungaanut isumaginninnikkut nakkutilliinermik suliaqarnissamut

pileraarusiusaaq, takuu § 36 imm. 3 naammassisinnaajumallugu politikkiliussaaq. Taannalu kommunip nittartagaani tamanut saqqummiunneqassaaq sivisunerpaamillu ukiut sisamat allortarlugit iluarsaateqqinneqartassalluni.

Imm. 4. Kommunalbestyrelsip meeqqanut attaveqartartussat sulisut pisortallu tamaasa atorfininnginnerini meeqqanut pinerliisimannginnerannut pinerluuteqarsimannginnerannullu uppermarsaatit pissarsiarisassavai, kiisalu sulisut suliassaannut tunngatillugu uppermarsaatit nalilorsorluartassallugit. Kommunalbestyrelsi immikkut pissutissaqartillugu pinerluuteqarsimannginnermut uppermarsaammik aamma meeqqanik pinerliisimannginnermut uppermarsaammik nutaamik pissarsiniarsinnaavoq.

§ 4. Inatsisartut inatsisaat meeqqanut 18-it inorlugin ukiulinnut Kalaallit Nunaani najugaqartunut atuuppoq, kiisalu meeqqanut 18-it inorlugin ukiulinnut utaqqiisaasumik Kalaallit Nunaanniikkallartunut, tassungalu ilaapput meeqqat timimkkut tarnimikkulluunniit innarluutillit, inunnut innarluutillinnuk ikorsiisarneq pillugu inatsit malillugu ikiorneqartartunut.

Imm. 2. §§-ini 2, 27, 28, 31, 32, 41, 42, 43mi 46-milu malittarisassat kiisalu najoqqutassat § 43, imm. 3 aamma § 42 imm. 7 malillugu atulersinneqartut taamatuttaaq meeqqanut pisortat ikorsiinerat tunngavigalugu Kalaallit Nunaata avataanut inissinneqartunut atuupput.

Imm. 3. Inatsisartut inatsisaat inuusuttunut 18-iniit 23-nik ukioqalerneq ilanggullugu § 42 naapertorlugu suliniuteqareernermermi malitseqartitsineq aamma atuutsinneqassaaq.

Imm. 4. Aammattaaq Inatsisartut inatsisaat angajoqqaanngortussanut, inuuniarnerminni pissutsit pissutigalugit ikiorserneqarnissamik pisariaqartitsisunut atuuppoq, tak. § 26.

Kapitali 2

Kommunalbestyrelsip pisinnaatitaaffi

Aaliangiisinnaanermut pisinnaatitaaffik

§ 5. Kommunalbestyrelsip aalajangiiffigisinnaavai:

- 1) meeqqanik ikorsiineq
- 2) inuusuttunut suliniuteqareernermermi malitseqartitsinissaq
- 3) meeqqat ikiorserneqarnerannik unitsitsineq aamma
- 4) inuusuttunut suliniuteqareernermermi malitseqartitsinermik unitsitsineq.

§ 6. Nukiginartumik meeqqamik inissiinanik aalajangiinissaq, meeqqat pinartumik pisariaqartitsinera pissutigalugu kommunalbestyrelsemitt siliarineqarnissaa utaqqinneqarsinnaangippat, aalajangiingallarneq kommunimi meeqqanik sulianik ingerlatsinermut oqartussaasoqarfimmi pisinnaavoq.

Imm. 2. Imm. 1 malillugu ikorsiinermik aalajangigaq unereersimassagaluarpualluunniit kommunalbestyrelsip ataatsimiinnerani tullermi ilisimatitsissutigineqassaaq.

Naammassinninneq

§ 7. Kommunalbestyrelsip aalajangikkami naammassineqarnissaat akisussaaffigaa.

Imm. 2. § 28 malillugu kommunalbestyrelsi aalajangiinerit naammassinissaat siunertaralugu, pisariaqartinneqartumik kinaassutsimut uppernarsaammik takutitsinermigut eqqartuussivimmillu aalajangiivigineqaqqaanngitsumik, meeraq ujarniarlugu nassarniarlugulu meeqqap angerlarsimaffianut isersinnaatitaavoq.

Imm. 3. Angerlarsimaffimmut iserneq § 45 malillugu isumaginninnikkut sulinermi misissuinermut aammalu meeqqap qanoq ingerlaneranut atatillugu pippat, peqqissusianut imaluunniit ineriarneranut aarlerinartoqarneranik aalajangiinissamut pisariaqartuuusutut isumaqarfingeqarpat, kinaassutsimik uppernarsaammik pisariaqartinneqartumik takutitsinikkut aamma eqqartuussivimmii aalajangiivigineqaqqaanngitsumik meeqqap najugaanut kommunalbestyrelse isersinnaatitaavoq.

Kapitali 3

Nakkutilliineq

§ 8. Kommunalbestyrelse meeqqat inuunerminni atugarisaannik nakkutilliissaaq. Nakkutilliineq ornigunnikkut paasiniaanikkullu ingerlanneqartassaaq, taamaalilluni kommunemi meeqqamik ikiorserneqarnissamik pisariaqartitsisumik sapinngisamik siusissukkut kommunalbestyrelse ilisimaarinnilerniassammat.

Imm. 2. Kommunalbestyrelsip meeqqamut pineqartumut angerlarsimaffiup avataanut inissinneqarsimasumut nakkutilliineq ingerlattassavaa.

Imm. 3. Kommunalbestyrelsip kommunimi ilaqtariit paarsisartut nakkutigisassara. Kommunalbestyrelsip ilaqtariinni paarsisartuni pisariaqartinneqarpat annertusisamik nakkutiginninnissaq aalajangissaavaa.

Imm. 4. Nakkutilliineq imm. 2 aamma 3 tunngavigalugit nalunaaqqaarluni nalunaaqqaarnaniluunniit nakkutilliinertut ingerlanneqarsinnaavoq.

Imm. 5. Naalakkersuisunit qinnuigineqarneq tunngavigalugu, imm. 1-imit 4 malillugu nakkutilliinermik kommunalbestyrelsip ingerlatsineranut paassisutissat kissaatigineqartut tamarmik nassiunneqarnissaat, kommunalbestyrelsip pisussaaffigaa.

Imm. 6. Naalakkersuisut nakkutilliinermut malittarisassanik aalajangersaasinhaapput, taassuma ataani kommunalbestyrelsip nakkutilliisussaatitaanermik suliaqarneranut, nakkutilliinerup aaqqissuunnissaanut, nakkutilliisussaatitaanerup naammassinissaanut atugassarititaasunik piumasaqaatinillu, sukannererusumik nakkutilliinissami piumasaqaatinut aammalu kommunalbestyrelsip nakkutilliinermut nalunaarusiaanut piumasaqaatinut.

§ 9. Naalakkersuisut Inatsisartut Inatsisaanni uani malittarisassanik kommunalbestyrelsip atuinera ingerlatsineralu pingarnertut nakkutigissavaat.

Imm. 2. Naalakkersuisut meeqqanut inuusuttunullu ulloq unnuarlu paaqqinniffinnik ingerlatsineq, aningaasartuuteqarneq perorsaanermillu nakkutilliineq ingerlatarissavaat.

Imm. 3. Nakkutilliineq nalunaaqqaarluni nalunaaqqaarnaniluunniit nakkutilliinertut ingerlanneqarsinnaavoq.

Imm. 4. Naalakkersuisut qitiusumik nakkutilliinermik ingerlatsiveqassapput (nakkutilliinermik ingerlatsivik), imm. 1 aamma 2-lu naapertorlugit nakkutilliinermik ingerlatsisartunik.

§ 10. Nakkutilliinermik ingerlatsivik, tak. § 9, pisariaqartinneqartumik kinaassutsimut uppernarsaammik takutitsinermikkut eqqartuussivimmilluunniit aalajangiivigineqaqqaanngitsumik, paasissutissat kommunip ingerlatsiviata pigisai tamaasa nakkutilliinerminnilu atorsinnaasorisatik takusinnaavaat, tamatumunnga aamma ilaapput inuit pillugit paasissutissat paasissutissalluunniit inunnut tunngasut mianerilluinnartariaqartut kiisalu suliffiup iluani allattugaatigineqartut.

Imm. 2. Nakkutilliinermik ingerlatsiviup nakkutilliineq pillugu allaganngorlugu communalbestyrelsimeq nalunaarusiaminni naoqqutarineqarsinnaasunik piumasaqaateqarsinnaapput. Nakkutilliinermik ingerlatsiviup aammattaaq nakkutilliineq tunngavigalugu communalbestyrelse pisussaaffiliisumik makkuninnga peqqussuteqarsinnaapput:

- 1) Inatsisartut inatsisaat una aallaavigalugu communalbestyrelse sulami ingerlanneqartumi ataatsimi arlalinnluunniit § 45 naapertorlugu isumaginninnermi sullissinermik misissuineq aallartissavaa imaluunniit § 46 naapertorlugu iliuusissanut pilersaarusiussaaq, taakkulu suliamik suliaqarnermi aallartitsinerit piffissap nakkutilliinermik ingerlatsiviup aalajangingaata iluani naammassineqarsimassapput. Suliaq imaluunniit suliat qanoq ingerlanerat pillugu nakkutilliinermik ingerlatsiviup ataavartumik communalbestyrelse paasissutissiisarnissa piumasaqaatigisinhaavaat.
- 2) Nakkutilliinermik ingerlatsiviup nakkutilliinerminnut atatillugu naliliippata, suliani pineqartuni kommunip ingerlatsivia Inatsisartut Inatsisaanni matumani aalajangersakkanik malinnissimanngitsoq, Inatsisartut Inatsisaat manna naapertorlugu suliamik naammassineqarsimasumik ataatsimik imaluunniit arlalinnik communalbestyrelse suliamik kingumut qaqtseqqissaq, imaluunniit
- 3) nakkutilliinermik ingerlatsiviup piffissaliunneqartup iluani communalbestyrelsip § 45 naapertorlugu isumaginninnermi sullissinermik misissuineq aallartissavaa, nakkutilliinermik ingerlatsivimmit naliliippata suliamik ingerlasumi imaluunniit naammassineqarsimasumi sukannererusumik ikiusoqartariaqartoq, tamannali aallartinneqarsimanani. Isumaginninnermi sullissinermik misissuinerup siunertaraa inatsit manna malillugu meeqqap maannakkut ikiorserneqarnissamik pisariaqartitsineranik paasisaqarnissaq, kiisalu sukannererusunik ikuinernik aallartitsisoqassanersoq.

§ 11. Nakkutilliinermik ingerlatsiviup, ulloq unnuarlu paaqqinniffiup paasissutissaatai nakkutilliinermut ingerlatsiviup nakkutilliinerannut pisariaqartinneqartut tunniunneqarnissaat pisinnaatitaaffigaat.

Imm. 2. Nakkutilliinermik ingerlatsivik ulloq unnuarlu paaqqinniffimmut peqqussummik aalajangiisinhaapput, tamatumalu eqquutsinnejcarnera apeqqutalersinnaavoq § 34 naapertorlugu ulloq unnuarlu paaqqinniffiup akuerineqarnerata ingerlaannarnissaanut. Peqqussutip eqquutsinnissaanut nakkutilliinermik ingerlatsivik piffissamik killiliisinnaavoq.

Imm. 3. Pissutsit takutippassuk ulloq unnuarlu paaqqinniffmmi sukannererusumik nakkutilliinissaq pisariaqartoq, nakkutilliinermut ingerlatsivik tamanna pillugu aalajangersinnaavoq. Sukannersumik nakkutilliinissamut aalajangernermut atatillugu nakkutilliinermik ingerlatsivik peqqussuteqassaaq, tak. imm. 2.

Imm. 4. Nakkutilliinermik ingerlatsivik ulloq unnuarlu angerlarsimaffimmi pissutsinik ernumanaateqarsinnaasunik malugisaqaruni, kommuninut meeqqap ulloq unnuarlu angerlassimaffianut akisussaasunut, pisariaqartitsineq naapertorlugu nalunaaruteqassaaq.

Imm. 5. Naalakkersuisut ersarinnerusunik malittarisassiussapput aaqqissuussaanermut nakkutilliinerullu

imarisassaanik, kiisalu qaqugukkut annertusisamik nakkutilliisoqassanersoq qaqugukkullu piumasaqaateqartoqassanersoq.

Kapitali 4

Isumaginninnikkut Aqutsisoqarfik

§ 12. Naalakkersuisut isumaginninnikkut aqtsiqarfeqassapput (*Isumaginninnikkut Aqutsisoqarfik*), tassanngaanniillu kommunini ingerlatsiviit aqtsisoqarfiillu Inatsisartut inatsisaat una malillugu meeqqat pillugit suliassani suliarinninnernut siunnersuisoqarnermut, ilitsersuisoqarnermut nakkutilliinernullu suliaqassalluni.

§ 13. Suliap suliarineranut paasissutissat pingaaruteqarluinnarpata, *Isumaginninnikkut Aqutsisoqarfik* kommunalbestyrelse qinnuigisinnavaa sulinerminut atasumik sulianut aalajangersimasunut paasissutissat inummut tunngasut mianernartuuusullu, nassiuteqqullugit.

Imm. 2. Kommunalbestyrelsip imm. 1 naapertorlugu paasissutissat inummut tunngasut taamaallaat ingerlateqqissinnaavai innuttaasup suliami pineqartumi akuersineratigut, taamaattoq tak. imm. 3.

Imm. 3. Imm. 2-mi allassimasutut akuersisoqanngippat imaluunniit allanik pissuteqarluni akuersisitsisoqarsinnaanngippat, suliami pissutsit, soorlu innuttaasup inatsisitigut innarlitsaalisaanera eqqarsaatigisariaqarpat, inuk pineqartoq pillugu paasissutissat kommunalbestyrelsip tunniussinnaavai.

§ 14. Kommunalbestyrelsip noqqaaneratigut *Isumaginninnikkut Aqutsisoqarfik* suliassanik ukununnga tunngasunik suliaqarsinnaavoq:

- 1) isumaginninnermi sulianik misissuineq, tak. § 45,
- 2) ikorsiinissamik suliniuteqarnerit, tak. kapitali 7,
- 3) ikorsiinissamik suliniuteqarnerit immikkut ittut, tak. kapitali 8,
- 4) ikorsiinissamik suliniuteqarnerit sukannererit, tak. kapitali 9, aamma
- 5) ikorsiinissamik suliniuteqarnernik suliniuteqarnerullu kingorna malitseqartitsinermik unitsitsineq, tak. kapitali 9.

Imm. 2. *Isumaginninnikkut Aqutsisoqarfik* suliap aalangiivigineqarnera pillugu tunngavilersukkamik kommunalbestyrelsimit allaganngorlugu inassuteqaateqassaaq.

Kapitali 5

Nalunaaruteqartussaatitaaneq

Nalinginnaasumik nalunaaruteqartussaatitaaneq

§ 15. Innuttaasoq kinaluunniit ilisimasaqaleruni meeqqap ingerlalluannginneranik, peqqissusianik ineriertorneranilluunniit navianartorsiortitsisumik meeqqap inuunermi atugaqarneranik kommunalbestyrelsimit nalunaaruteqarnissamik pisussaaffeqarpoq.

Imm. 2. Sapaatip akunnera qaangiutsinnagu nalunaarutiginninneq tiguneqarpat kommunalbestyrelse innuttaasumut allakkatigut ilisimatitsissaq nalunaarutiginninneq tigusimallugu.

Nalunaaruteqarnissamut pisussaaffik sakkortunerusoq

§ 16. Innuttaasoq kinaluunniit isumaginnittoqarfimmi, atuarfeqarfimmi peqqinnissaqarfimmiluunniit kiisalu ulluunerani paaqqinnittarfinni sulisunut sulinerminut atatillugu Inatsisartut Inatsisaat una malillugu meeqqamik ikiorserneqarnissamik pisariaqartitsisumik ilisimasaqaleruni, kommunalbestyrelsimit ingerlaannartumik nalunaaruteqarnissaminut sakkortunerusumik pisussaaffeqarpoq. Taamatuttaaq nalunaaruteqartussaatitaanermut pisussaaffik innuttaasunik qinikkanik imaluunniit inuiaqatigiinnik sullissinermik tunngaveqartumik suliaqartunut atuuppoq.

Imm. 2. Aammattaaq imm. 1 malillugu nalunaaruteqartussaatitaaneq aammattaaq atuuppoq sulisoq paasisaqarpat pasitsaassaqarpalluunniit angajoqqaanngortussat immikkut ikiorserneqarnissamik pisariaqartitsisut, tak. § 26.

Imm. 3. Sapaatip akunnera qaangiutsinnagu nalunaarutiginninneq tiguneqarpat kommunalbestyrelse sulisumut nalunaarutiginnittumut allakkatigut ilisimatitsissaaq nalunaarutiginninneq tigusimallugu.

Kommunit akunnerminni nalunaaruteqarnissamut pisussaaffiat

§ 17. Ilaqutariit 18-it inorlugit ukiulimmik meerallit kommunimiit kommunimut allamut nuuppata, meeraru immikkut ikiorserneqarnissamik pisariaqartitsisutut kommunip qimanneqartup isumaqarfigiguniuk, Inatsisartut inatsisaat una tunngavigalugu tamanna pillugu kommune qimanneqartoq kommunimut nuuffigineqartumut allaganngorlugu nalunaaruteqassaaq.

Imm. 2. Ernisoqarnissaa sioqqullugu imaluunniit ernisoqareernerata kingorna angajoqqaanngortussat ikiorserneqarnissaannik pisariaqartitsisutut naliliiffigineqarpata, kommune qimanneqartoq imm. 1 malillugu taamaaqataanik nalunaaruteqarnissamut pisussaaffeqarpoq.

Imm. 3. Imm. 1 imaluunniit 2 malillugit nalunaaruteqarnermut atatillugu, suliamut attuumassuteqartut kommunip qimanneqartup nassiuressavai, tassunga ilanngullugit kommunip qimanneqartup naliliinerminut tunngavigisimasai paassisutissat attuumassuteqartut eqikkarneri.

Imm. 4. Ilaqutariit 18-it inorlugit ukiulimmik meerartallit imaluunniit angajoqqaanngortussat kommunimut Kalaallit Nunaata avataaniittumut allamulluunniit pisortaqarfimmut assingusumut nuuppata, imm. 1-3 atuutissapputtaaq.

Nuna tamakkerlugu nalunaaruteqartarfik

§ 18. Naalakkersuisut nalunaaruteqartarnerit pillugit ataatsimut paassisutissiinissamik siunertaqartumik §§ 15-17 malillugit nalunaaruteqarnermut tunngasunik nuna tamakkerlugu nalunaaruteqartarfimmik pilersitsissapput.

Imm. 2. Nuna tamakkerlugu nalunaaruteqartarfimmik ingerlatsineq, isumaginninneq paassisutissanillu katersineq pillugit maleruagassanik erseqqinnerusunik Naalakkersuisut aalajangersaasinnaapput.

Nalunaaruteqarnermi kommunip iliuuseqarnissamut pisussaffia

§ 19. Kommunalbestyrelsi nalunaarummik tigusaqaruni, tak.§§ 15, 16 imaluunniit 17, akunnerit 24-t iluanni isumaginninnikkut misissuitisinissamik tunngavissaqarnersoq aalajangiiffigissavaa tak.§ 45.

Imm. 2. Imm. 1 naapertorlugu communalbestyrelse isumaginninnermi sullissinikkut misissuinermik aallartitsinissamik aalajangiippat, tamanna piaarnerpaamik aammalu nalunaarutip tiguneqarneraniit kingusinnerpaamik sapaatit akunneri marluk qaangiutsinnagit misissuineq aallartinneqassaaq.

Imm. 3. Nalunaarummik tigusinermi isumaginninnikkut misissuineq ikiuigallarnerlu ingerlaannartumik aallartinneqassapput, taamaattoq kingusinnerpaamik akunnerit 24-t iluanni, nalunaaruteqarnerup communalbestyrelsi pasitsaassaqartilerpagu uku pillugit:

1) paarsinerluttoqarsimaneranik,

2) meeqqamik imaluunniit illoqatigiinni inoqutigiit allat akornani nakuusertoqarsimaneranik imaluunniit siorasaarisoqarsimaneranik, imaluunniit

3) meeqqamik kinguaassiutitigut atornerluisoqarsimaneranik.

Imm. 4. Imm. 3 naapertorlugu nalunaarummik tigusaqartoqarnerani, communalbestyrelse ingerlaannartumik politiinut nalunaarutisineq pillugu nalunaarutiginnissaaq.

Imm. 5. Kommunalbestyrelsip iliuuseqarnissamut pisussaaffia, qulaani allassimasut imm. 1-imii 4-mut naapertorlugit, aamma atutissaaq communalbestyrelsip nammineerluni, tassalu nalunaaruteqartoqarnera tunngaviginagu, meeqqamut pissutsit ernumanartoqartut maluginiarpagit.

Kapitali 6

Siunnersuineq

§ 20. Kommunalbestyrelsi meeqqamut, ilaquaasunut imaluunniit meeqqap isumassuisuinut kiisalu angajoqqaangortussanut meeqqap peroriatornera, atuarnera, ilinniagaqarnera, atugarissaarnera il.il. pillugit siunnersuisinnaavoq. Siunnersuinerup siunertaraa inuttut ajornartorsiulersinnaanermik pinaveersaartitsinissaq, meeqqallu maannakkorpiaq ajornartorsiutigisaanik ikorneqarnissaa. Piffissaq ungasinnerusoq eqqarsaatigalugu siunertaavoq ilaqtariit imaluunniit meeqqamik isumassuisut meeraq peqatigalugu meeqqap ilaqtariillu ajornartorsiutaannik nammineerlutik qaangiiniarsinnaalernissaat.

Imm. 2. Siunnersuineq lnatsisartut inatsisaat una imaluunniit inatsit alla aallaavigalugu immikkoortilluguluunniit ingerlanneqarsinnaavoq imaluunniit ikorsiinissamik suliniuteqarnermut atasumik ingerlanneqarsinnaalluni. Taamaattumik communalbestyrelsip siunnersuinerminut atatillugu eqqumafifigissavaa, meeraq ilaqtariilluunniit imaluunniit meeqqamik isumassuisuusut lnatsisartut inatsisaat una inatsilluunniit alla aallaavigalugu ikorsiinissamik suliniuteqarfingineqarnissaat pisariaqartinneqarnersoq.

Kapitali 7

Ikorsiissutit

§ 21. Kommunalbestyrelsip ikorsiinissamik suliniuteqarnissaq aalajangissavaa meeqqap immikkut pisariaqartitsineranut annertuumik tamanna pingaaruteqartutut isigineqarpat.

Imm. 2. Kommunalbestyrelsip meeqqamik ilaqtariinnillu oqaloqateqarnermigut ikorsiinissamik suliniut meeqqap ilaqtariillu ajornartorsiutaannik pisariaqartitaannillu aaqqissuutaasussaq toqqassavaa. Ikorsiinissamik suliniummik neqerooruteqartoqartinnagu communalbestyrelsip meeraq

tusarniaavigereersimassavaa, tak. § 43, isumaginninnikkut misissuereersimassaaq takuuk § 45, aamma iliuusissamik pilersaarummik suliaqareersimassaaq.

Imm. 3. Ikorsiinissamik suliniummik neqerooruteqarnissamik aalajangerneq tunngavilersuinermik malitseqassaaq, tassani nassuiarneqassalluni ikorsiinissamik suliniuteqarnermut siunertaanullu tunngaviusoq.

Imm. 4. Kommunalbestyrelse ikorsiinissamik suliniuteqarnerup neqeroorutigineqarnissaanut imaattunik aalajangiissuteqarsinnaavoq:

- 1) ilaqtariinnik pikkorissartitsineq, ilaqtariinnik isumasioqatigiissitsineq imaluunniit attaveqaatit peqatigalugit ataatsittoqassasoq,
- 2) tapersorsorteqarnissaq aamma attaveqartarfegarnissaq, tak. § 22,
- 3) efterskolumiinnermi ikorsiinissaq, tassunga ilanngullugu aningaasatigut ikorsiinissaq,
- 4) ikorsiineq alla meeqqap ineriarorneranik ingerlalluarnissaanillu qulakkeerinninnissamik siunertaqartoq, tassaasinnaavoq aningaasatigut ikorsiinermik neqerooruteqarneq, tamanna meeqqap angerlarsimaffiup avataanut inissinneqarsinnaaneranik pinaveersaartitsisinnaappat imaluunniit pinngitsoortitsisinnaappat, assersuutigalugu inigisap attartorneranut akiligassaqarneq imaluunniit inigisamut akiligassap tulliuttup akilersinnaannginneranik il.il. pissuteqartumik attartukkamit anisinneqartarialersinnaaneq pinngitsoortinniarlugu.

Imm. 5. Imm. 4, nr. 3-mut atatillugu meeqqap aalajangersimasup sullinneqarnerata ataaniiffigisai efterskolit sullinniakkankit tigusinissaminnut naleqquttuussapput.

Imm. 6. Kommunalbestyrelsip imm. 4-mi ikorsiinissamik suliniuteqarnertut taaneqartunit allaanerusut neqeroorutigisinnavaai, soorlu misiligtutut aaqqissuussinerit.

Imm. 7. Imm. 4-mi nr. 3 naapertorlugu ikorsiineq Naalakkersuisut malittarisassiuussinnaavaat, kiisalu ikorsiinissamik suliniutinut allatut isikkulinnut imm. 6 malillugu malittarisassiuussisinnallutik.

§ 22. Kommunalbestyrelsip meeqqamut taassumalu ilaquaanut isumassuisuinulluunniit tapersorsortiliineq attaveqarfigisartagaliinerlu ikorsiinertut aalajangiiffigisinnavaat, tak. § 21, imm. 4, nr. 2.

Imm. 2. Tapersorsorti attaveqarfigisartagarlu ilaatigut:

- 1) meeqqap peroriartornerani, atuarnerani, ilinniagaqarnerani il.il. suliassanut tunngasunik siunnersuisinnaavoq aamma
- 2) meeqqap, ilaquaasut isumassuisuusulluunniit pisariaqartitaat apeqquataillugit inuttut qanimut ikiuisinnaalluni.

Imm. 3. Kommunalbestyrelsip tapersorsortaallunilu attaveqarfigisartagassaq atorfinitssissavaa, taannalu taamatut sulinissamut immikkut piginnaasaqassaaq.

Imm. 4. Atorfinitnernmut atatillugu aammalu pissutsit immikkut ittut pisariaqarlersitsippata, tapersorsortaallunilu attaveqarfigisartagassaq akuersitinneqassaaq meeqqanik pinerlussimannginnermut kiisalu pillagaasimannginnermut uppermarsaatnik tunniussinissaanut.

Imm. 5. Naalakkersuisut tapersorsortaallunilu attaveqarfigisartagassamut pisinnaasanut – piginnaasanullu piumasaqaatit pillugit erseqqinnerusunik malittarisassanik aalajangersaasinnapput.

§ 23. Kommunalbestyrelsip angajoqqaat akisussaanerat pillugu oqaloqatigiinnissamut angajoqqaatut oqartussaassusilik aggersarsinnaavaat, meeqqap ineriarornera imaluunniit ingerlalluarnera navianartorsiortinneqarpat angajoqqaatut oqartussaassusillip akisussaanerminik naammassinnissinnaannginneranik tamanna pissuteqarpat.

Imm. 2. Angajoqqaatut oqartussaassusilimmik oqaloqateqarnissamik aggersaanermut paasissutissat makkununnga tunngasut pigineqassapput

- 1) meeraq atuanngitsuukulappat imaluunniit atuartussaanermut pisussaaffeqarneq naammassineqarsimanngippat,
- 2) meeraq arlaannik annertussusilimmik arlaannillu sakkortussusilimmik pinerluttuliorisimappat,
- 3) meeraq piissulorsornermigut annertuumik ajornartorsiuteqarpat sungiussiniarmerminiluunniit ajornartorsiuteqarpat, imaluunniit
- 4) angajoqqaatut oqartussaassusillip meeqqap ajornartorsiutaasa qaangerniarnissaannut kommunalbestyrelsik suleqateqarumanngippat.

Imm. 3. Angajoqqaat akisussaanerat pillugu oqaloqatigiinnerup kingunerissavaa, angajoqqaatut oqartussaassusilimmut meeqqap ajornartorsiutaasa qaangerneqarnissaannut iluaqtaasussatut naleqquttunik kiisalu siunertamut naammaginartumik naleqquttunik ersarissumillu ataatsimik arlalinilluunniit pisussaaffiliineq.

Meeqqat akisussaaffeqarnerat

§ 24. Kommunalbestyrelsip meeraq 12-init 17-it angullugit ukiulik meeqqap akisussaaffeqarnera pillugu oqaloqatiginissaanut aggersarsinnaavaa, meeraq piissulorsornermigut ajornartorsiuteqarpat piissulorsorneraluuunniit pitsaanngitsoq ima isikkoqarpat, meeqqap ineriarneranut, ingerlalluarneranut peqqissusaanulluunniit ajoqtaasinnaalluni.

Imm. 2. Meeqqat akisussaaffeqarnerat pillugu oqaloqateqarnissamut aggersaanermi paasissutissat makkununnga tunngasut pigineqassapput

- 1) meeraq atuanngitsuukulappat imaluunniit atuartussaanermut pisussaaffeqarneq naammassineqarsimanngippat,
- 2) meeraq arlaannik sakkortuumilluuniit pinerluttuliorisimappat, imaluunniit
- 3) meeraq piissulorsornermigut annertuumik ajornartorsiuteqarpat imaluunniit sungiussiniarmermini ajornartorsiuteqarpat.

Imm. 3. Meeqqap akisussaaffeqarnera pillugu oqaloqatigiinnerup kingunerissavaa meeqqap ajornartorsiutaasa qaangerneqarnissaannut iluaqtaasussatut naleqquttunik aammalu siunertamut naammaginartumik naleqquttunik, ersarissumik ataatsimik arlalinilluunniit pisussaaffiliinermik taasaqarneq.

Imm. 4. Meeraq aserorterisimappat meeqqat akisussaaffeqarnerat pillugu oqaloqatigiinnerup ilaatut kommunalbestyrelsip meeraq aserukkap aaqqinnejqarnissaanut peqataanissaanik piumaffigisinnaavaa, angajoqqaatullu oqartussaassusilik erngerlugu tamatuminnga ilisimatinneqassaaq. Meerarli aserukkami aaqqinissaanut akiliinissaanik piumaffigineqanngisaannassaaq.

Kapitali 8

Ikiorsiissutit immikkut ittut

Aalajangiinissamut pisinnaatitaaffik

§ 25. Kommunalbestyrelsip meeqqap immikkut ittumik ikiorneqartariaqarnera annertuumik pingaarutilittut isigisariaqarpat, immikkut ittunik ikorsiinissamik suliniuteqarnissat aalajangiiffigissavai.

Imm. 2. Kommunalbestyrelsip ikorsiinissamik suliniutit immikkut ittut aalajangiiffinginnerini meeraq tusarniaqqaarsimassavaa, tak. § 43, isumaginninnikkut sullissinermik misissuisimassalluni, tak. § 45, aammalu iliuusissanut pilersaarusiorsimassalluni, tak. § 46. kommunalbestyrelsip isumaginninnermi sullissinikkut misissuinermeri ajornartorsiutinut pisariaqartitsinernullu paasineqartunut pitsaanerpaamik aaqqiissutaasinnaasut toqqassavai. Iliuusissanut pilersaarut isumaginninnermi sullissinikkut misissuinermut atasumik suliarineqartup ikorsiinissamik suliniuteqarnerup taassumalu siunertaanut suut tunngaviunerinik allaaserinnissalluni.

Imm. 3. Kommunalbestyrelsip meeqqap ikorsiinissamik suliniuteqarnermik pisariaqartitsinerata isumaginninnermi sullissinikkut misissuinissaq iliuusissanullu pilersaarusiornissaq utaqqisinnaanngippagit, misissuineq ingerlaqtigalugu imm. 4 malillugu ikuigallarneq aallartissavai.

Imm. 4. Kommunalbestyrelsip ikorsiinissamik suliniutit immikkut ittut neqeroorutigineqarnissaat aalajangiiffigisinnaavai, soorlu:

- 1) angerlarsimaffimi suliassanik, perorsaanermik, tarnip pissusaanik ilisimasalimmik, isumaginninnermik allatigulluunniit ikorsiineq,
- 2) ilaqtariinnik katsorsaaneq, atornerluisuunermik katsorsaaneq tassungaluunniit assingusoq,
- 3) ilaqtariinni paarsisartuni imaluunniit ulloq unnuarlu paaqqinniffimi oqilisaassilluni inissiineq,
- 4) ulluunerani meeqqat ornittagaanni toqqisisimanartumiitsitsineq, unnulererani unnuaaneraniluunniit ikiuinissamik suliniuteqarneq alla, imaluunniit meeqqamut ikiuinissamik ilinniartitsinissamillu siunertaqartumik paaqqinnittarfimmiitsitsineq, assigisaaniluunniit,
- 5) ornittakkami immikkut ittumik perorsaaviusumik inissaqartinneqarneq, imaluunniit
- 6) meeqqap ineriertornerata ingerlalluarissaalu qulakkeernissaat siunertaralugit ikorsiineq alla.

Imm. 5. Kommunalbestyrelsip qinnuteqarnerata kingorna Naalakkersuisut ikorsiinissamik suliniutinik immikkut ittunik imm. 4-milu taaneqartuni allaanerusunik, soorlu misileraalluni aaqqissuussinernik aamma meeqqanut inuuusuttunullu suliniuteqareernerup kingorna malitseqartinneqartunut immikkut ittumik perorsaanernik pilersitsisinnaanermik akuersisinnaapput.

Imm. 6. Naalakkersuisut malittarisassanik erseqqinnerusunik aalajangersaaffigisinnaavaat:

- 1) imm. 4 malillugu ikorsiinissamik suliniuteqarnerit immikkut ittut, aamma
- 2) ikorsiinissamik suliniutit immikkut ittut imm. 4-mi taaneqartunit allaanerusut, taakkuninngalu imm. 5 malillugu akuersissuteqarneq.

Angajoqqaanngortussanut ikorfartuineq.

§ 26. Kommunalbestyrelse angajoqqaanngortussanut ikorsiinissamik suliniuteqarnernik neqerooruteqarsinnaavoq, tak. kapitali 7-9, taakku inooriaaserisaat meeqqap suli erniusimangngitsup ingerlalluarneranut, peqqissusianut perioriartorneranullu ulorianartorsiortitsissappata.

Imm. 2. Meeqqap inooraap pisariaqartitaanik naammassinninnissamut angajoqqaanngortussat ajornartorsiuteqartussat kommunalbestyrelsip naliliiffigippagit, kommunalbestyrelse naartunerup

nalaani aalajangiissaq, ikorsiinissamik suliniuteqarnerit kapitali 7-9-mi allassimasut erninerup kingorna aallartinneqassasut.

Imm. 3. Kommunalbestyrelsip angajoqqaanngortussanut ikorsiinissamik suliniutit aalajangiiffinginnerini isumaginninnikkut sullissinermik misissuisimassaaq, tak. § 45, iliuusissanillu pilersaarusiorsimassalluni, tak. § 46. Isumaginninnermi sullissinikkut misissuinermermi ajornartorsiutinut pisariaqartitsinernullu paasineqartunut pitsaanerpaamik aaqqissutaasinnaasut kommunalbestyrelsip toqqassavai. Iliuusissanut pilersaarut isumaginninnermi sullissinikkut misissuinermut atasumik suliarineqartup ikorsiinissamik suliniuteqarnerup taassumalu siunertaanut suut tunngaviunerinik allaaserinnissaq. Iliuusissanut pilersaarut erninerup siorna kingornalu qanoq ittunik ikorsiinissamik suliniuteqartoqarnissaanik imaqassaaq.

Imm. 4. Suliniuteqarneq ataatsimoortitaallunilu ataqatigiissinnejarsimassaaq oqartussaasut attuumassuteqartut suleqatigalugit, pingaartumik peqqinnissaqarfimmi oqartussat.

Kapitali 9

Ikorsiinissamik suliniuteqarnerit sukannernerit

Angajoqqaatut oqartussaassusilimmik akuersititseqqaarluni inissiineq

§ 27. Kommunalbestyrelsip aalajangissavaa meeraq angerlarsimaffiup avataanut inissinneqassanersoq isumaginninnikkut § 45 malillugu misissuinerup takutippagu, meeqqap ikiorserneqarnissamut immikkut pisariaqartitaanik akuersinissamut annertuumik pingaaruteqartoq.

Imm. 2. Kommunalbestyrelse imm. 1 malillugu aalajangiisinnanngilaq, aatsaalli meeraq tusarniarneqqaarsimappat, tak. § 43, isumaginninnikkut sullissinermik misissuisoqarsimappat, tak. § 45, aammalu iliuusissanut pilersaarusoqarsimappat, tak. § 46.

Imm. 3. Meeqqamut pitsaanerpaasussaq eqqarsaatigalugu meeqqap inissittariaqarnerata isumaginninnermi sullissinikkut misissuineq iliuusissanullu pilersaarusiorneq utaqqisinnaannngippagit, misissuinerup nalaani inissiineq kommunalbestyrelsip aallartissavaa.

Imm. 4. Angajoqqaatut oqartussaassusilik ilaqtuttallu allat meeqqap inissinneqarfingisaani ulloq unnuarlu inisisimasinnaanerannik neqeroorfingeqarsinnaapput.

Angajoqqaatut oqartussaassusilimmik akuersititsinani inissiineq

§ 28. Kommunalbestyrelsip angajoqqaatut oqartussaassusilik meeraruunniit akuersiteqqaarnagit meeqqap angerlarsimaffiup avataanut inissinneqarnissaa aalajangissavaa, meeqqap peroriartorneranut, peqqissusianut ineriartorneranulluunniit ilungersunartumik ajoquserneqarnissaa aarlerinarluinnarpas makku pissutigalugit:

- 1) meeqqamut amigartumik isumassuisoqarpas isumassuisoqanngippalluunniit,
- 2) timikkut tarnikkulluunniit persuttaaneqarsimappat, paarsinerluttoqarsimappat kinguaassiutigulluunniit innarliisoqarsimappat,
- 3) meeqqami imaluunniit meeqqap qanigisaanik atornerluinermik ajornartorsiuteqartoqarpas, pinerlunniartartoqarpas allatigulluunniit inuuniarnikkut annertuunik ajornartorsiuteqartoqarpas, imaluunniit

4) meeqqami meeqqalluunniit qanigisaanik pissutsikkut naleqqussarnissamut allatigulluunniit ajornartorsiuteqartoqarpat,

Imm. 2. Imm. 1 malillugu taamaallaat aalajangiisoqarsinnaavoq, ajornartorsiutit meeqqap angerlarsimaffimmi najugaqaannarneratigut aaqqinnejqarsinnaanngitsut communalbestyrelsip tunngavissalimmik ilimagippagu.

Imm. 3. Kommunalbestyrelse imm. 1 malillugu aalajangiisinnaanngilaq, aatsaalli isumaginninnikkut sullissinermik misissusoqarsimappat, tak. § 45, aammalu iliuusisanut pilersaarusiortoqarsimappat, tak. § 46. Aammattaaq kommunalbestyrelsip meeraq tusarniarfigisinnassaavaa, tak. § 43, tassungalu atasumik meeraq angajoqqaatullu oqartussaassusilik nalunaarfisisimassallugit meeqqap illersusoqarnissaanik pisinnaatitaaffeqarneranik, tak. § 44. Angajoqqaatut oqartussaassuseqartup najugaa imaluunniit sumiiffia ilisimaneganngippat nalunaarut meeqqamik isumassuisuusumut tunniunneqassaaq.

Imm. 4. Meeqqamut pitsaanerpaasussaq eqqarsaatigalugu meeqqap inissittariaqarnerata isumaginninnermi sullissinikkut misissuineq iliuusisanullu pilersaarusioneq utaqqisinnaanngippagit, misissuinerup nalaani inissiineq kommunalbestyrelsip aallartissavaa.

§ 29. § 28 malillugu kommunalbestyrelsip angerlarsimaffiup avataanut akuersititseqqaarnani inissiinermik akuersissuteqarneq angajoqqaatut oqartussaassusilimmut imaluunniit meeqqamik isumaginnittuusumut sapinngisamik akunnerit 24-t qaangiutsinnagit nalunaarutigisimassavaa. Nalunaarut inissiinermik aalajangiisoqarnerata sumik tunngaveqarneranik imaqassaaq kiisalu naammagittaalliorssinnaanermut ilitsersuut.

Imm. 2. Angerlarsimaffiup avataanut inissiinermik aalajangerneq akuersinermik akuersinertaqanngitsumilluunniit pisimappat, aalajangiisoqarnerata kingorna ullut arfineq-pingasut qaangiutsinnagit Naalakkersuisunut nalunaarutigineqassaaq.

Kapitali 10

Inissiiffit

Aalajangiinissamut pisinnaatitaaffik

§ 30. Kommunalbestyrelsip inissiiffissaq aalajangiiffigissavaa meeqqap pisariaqartitaanik nalilersuineq aammalu isumaginninnikkut sullissinermik misissuineq, tak. § 45, aallaavigalugit. Inissiiffissamik toqqaanerup iliuusisanut pilersaarummi inissiinermut siunertatut taaneqartut tunngavissaqartissavai aammalu meeqqap inissinneqarnerata ingerlaneranik ataqtigiiittoqarnissaa qulakkiissallugu.

Imm. 2. Meeqqap inissinneqarfia tassaasinnaavoq:

- 1) kommunip aaqqissuussaanik ilaqtariinni paarsisartuni inissinneqarneq, tak. § 37,
- 2) ulloq unnuarlu paaqqinniffik, tak. § 33,
- 3) ulloq unnuarlu paaqqinniffimmi isumannaallisaavigisamik immikkoortortaqarfik, tak. § 36, imaluunniit
- 4) nammineq ineerarisaaq, inissiani inigisaq, najugaqtigiiiffit, efterskolit assigisaalluunniit.

Imm. 3. Meeraq pingasut inorlugit ukiulik inissinneqarpat, meeqqap pingasunik ukioqalernissaa sioqqullugu inissiiffimmut allamut nuunneqarsinnaanngilaq, aatsaalli immikkut illuinnartunik pissutissaqartoqarpat taamatut iliortoqarsinnaalluni.

Imm. 4. Inissiineq pillugu maleruagassanik erseqqinnerusunik Naalakkersuisut aalajangersaasinnaapput,

tassunga ilanngullugit uku pillugit:

- 1) misissuineq,
- 2) inissiinerup sivisussusissaa,
- 3) inissiiffimmik allannguineq,
- 4) inissiinerup ingerlaqinnissa unitsinneralu aamma
- 5) qatanngutigiinnik inissiinerit.

Imm. 5. Aamma inissiinerup nalaani neqeroorutit inerteqqutillu pillugit maleruagassanik erseqqinnerusunik Naalakkersuisut aalajangersaasinnaapput, tassunga ilanngullugit uku pillugit maleruagassat:

- 1) inissiinerup nalaani meeqqamut pulaarneq attaveqarnerlu, aamma
- 2) inissiinerup nalaani immikkut eqqarsaatigisassat.

§ 31. Kommunalbestyrelsip qulakkiissavaa meeqqat Kalaallit Nunaanni inissinneqarnissaat, taamaattoq tak. imm. 2.

Imm. 2. Meeqqap pisariaqartitai Kalaallit Nunaanni naammassineqarsinnaanngippata aamma Kalaallit Nunaanni inissiinissamut periarfissaarutivippat Naalakkersuisut akuersiteeqqaarlugit Kalaallit Nunaata avataanut inissiisoqarsinnaavoq.

Imm. 3. Naalakkersuisut Kalaallit Nunaata avataanut inissiinernut malittarisassanik erseqqinnerusunik aalajangersaasinnaapput.

§ 32. Meeraq imaluunniit inuuusuttoq suliniuteqareerneremi malitseqartitsilluni suliniuteqarfingineqartoq nunagisap avataani angerlarsimaffiup avataanut inissinneqarsimasoq angerlarsimaffiminut ukiumut marloriarluni tikeraarluni angalatinneqarsinnaavoq.

Imm. 2. Meeqqamut ajunnginnerussappat, tikeraarluni angalanermut taarsiullugu angajoqqaatut oqartussaassusilinnut qanigisaasumulluunniit allamut tunniunneqarsinnaavoq, taamaalilluni taanna meeqqap imaluunniit inuuusuttup suliniuteqareerneremi malitseqartitsilluni suliniuteqarfingineqartup inissinneqarfingisaanut tikeraarsinnaanngorlugu. Illusimatitsinermut aningaasartuutit kommunalbestyrelsimit akilerneqassapput.

Imm. 3. Meeraq imaluunniit inuuusuttoq suliniuteqareerneremi malitseqartitsilluni suliniuteqarfingineqartoq nunagisap avataani angerlarsimaffiup avataani efterskolertoq ukiup efterskoleriusup ingerlanerani angerlarsimaffiminut ukiumut ataasiarluni tikeraarluni angalatinneqarsinnaavoq. Tikeraartitsilluni angalanissamut imm. 2 naapertorlugu akiliussinissamut periarfissaqarpoq.

Imm. 4. Naalakkersuisut tikeraarluni angalasarnerit pillugit erseqqinnerusumik malittarisassiorsinnaapput, matumani aningaasartuutit ilanngullugit.

Ulloq unnuarlu paaqqinniffit

§ 33. Ulloq unnuarlu paaqqinniffinni inissat pisariaqartinneqartutut amerlassusillit pigineqarnissaat Naalakkersuisut isumagisassaraat, tassunga ilanngullugit ulloq unnuarlu paaqqinniffit immikkoortortaqarfifini isumannaallisakkani inissat.

Imm. 2. Ulloq unnuarlu angerlarsimaffit Naalakkersuisunit, kommunalbestyrelsinkin ataatsink arlalinnilluunniit ataatsimoorunneqarlutik imaluunniit paaqqinnittarfinnit imminnut pigisunit

pilersinneqarlutillu ingerlanneqarsinnaapput.

Imm. 3. Ulloq unnuarlu paaqqinniffit immikkoortortaqrfit isumannaallisakkat Naalakkersuisunit, kommunalbestyrelsinit ataatsinit arlalinnilluunniit ataatsimoorunneqarlutik pilersinneqarlutillu ingerlanneqarsinnaapput.

Imm. 4. Ulloq unnuarlu paaqqinniffit tak. imm. 2, Naalakkersuisunut ukiumoortumik nalunaarusiortassapput. Naalakkersuisut Inatsisartut upernaakkut ataatsimiinneranni ukiumoortumik nalunaarusiamik Inatsisartunut agguassisassapput.

Imm. 5. Ulloq unnuarlu paaqqinniffiup communalbestyrelsimek suleqateqarluni isumaginninnermi sullissinernik allanik suliaqarsinnaanera Naalakkersuisut malittarisassiuussinnaavaat.

§ 34. Ulloq unnuarlu paaqqinniffit tak. § 33, imm. 2, matumani ulloq unnuarlu paaqqinniffinni immikkoortortat isumannaallisakkat ilanngullugit, tak. § 33, imm. 3, Naalakkersuisunit akuerineqarsimassapput. Aammattaaq Naalakkersuisunik ingerlatsinermut atuuttumik isumaqatigiissusiortoqarsimassaq

Imm. 2. Ulloq unnuarlu paaqqinniffiup maleruagassanik erseqqinnerusunik Naalakkersuisut aalajangersaassapput, matumani ulloq unnuarlu paaqqinniffinni immikkoortortat isumannaallisakkat ilanngullugit, kiisalu ulloq unnuarlu paaqqinnittarfinnut innersuussisarnernut naammagittaalliorisinnaanermullu periarfissamik.

Imm. 3. Naalakkersuisut ulloq unnuarlu angerlarsimaffit pillugit erseqqinnerusunik malittarisassanik aalajangersaasinnaapput, matumani ulloq unnuarlu angerlarsimaffinni immikkoortortat isumannaallisakkat kiisalu ulloq unnuarlu angerlarsimaffinni sulisunut pisortanullu tamanut tunngatillugit pillagaasimannginnermik meeqqanillu pinerliisimannginnermut uppernarsaatit ilanngullugit.

§ 35. Ulloq unnuarlu paaqqinniffit, matumani angerlarsimaffimi isumannaallisakkanik immikkoortortallit ilanngullugit, meeqqanik ulloq unnuarlu paaqqinniffimmut inissinneqartitserusuttunut tigusinissaminnut pisussaatitaapput ulloq unnuarlu paaqqinniffik inissaqarpat, inissiinerlu ulloq unnuarlu paaqqinniffiup siunertaanut suliniuteqarfigisaanullu naapertuuppat. Aalajangersagaq § 36 malillugu inissiinerni il. il. aamma atorneqassaaq.

Imm. 2. Imm. 1-imi piumasaqaatit eqqortinnejarnersut pillugit communalbestyrelsip ulloq unnuarlu paaqqinniffiup akornanni isumaqatigiinngitqarpat isumaqatigiinngissutaasoq Naalakkersuisunut aalajangigassanngorlugu saqqummiunneqassaaq.

Imm. 3. Naalakkersuisut aalajangiinerat, tak. imm. 2, naammagittaalliuutigineqarsinnaanngilaq erngerlunilu malinneqassalluni.

§ 36. Kommunalbestyrelsip aalajangersinnaavaa meeraq §§-it 27 imaluunniit 28 malillugit inissinneqarsimasoq, ulloq unnuarlu paaqqinniffiup immikkoortortaanut isumannaallisakkamut inissinneqassanersoq. Immikkoortortat isumannaallisakkani matut silarliit igalaallu parnaarsimajuartinneqarsinnaapput. Ulloq unnuarlu paaqqinniffiup immikkoortortaanut isumannaallisakkamut inissiinissaq taamaallaat aalajangiiffigineqarsinnaavoq, ukua tunngavigalugit:

1) Meeraq aqqaneq-marluk 15-illu akornanni ukioqartoq sakkortuumik inatsisinik unioqqutitsismappat, meeqqap allalluunniit isumannaatsutinnissaat eqqarsaatigalugit ulloq unnuarlu paaqqinniffiup immikkoortortaanut isumannaallisakkamut inissiisariaqarneq pisariaqartinneqarluiinnalersimappat.

Imm. 2. Aammalu ulloq unnuarlu paaqqinniffiup immikkoortortaa isumannaallisagaq meeqqanut 15-it 18-illu akornanni ukiulinnut atorneqarsinnaavoq pisuni ukunani:

- 1) Meeraq tigusarineqarsimappat tigusarininnerlu eqqartuussinermut inatsit § 358 malillugu eqqartuussiviup angerlarsimaffik inissiiffluunniit alla naleqquttuusorippagu tak. § 361, imm. 2, nr. 3-lu.
- 2) Meeraq tigummigallarneqarpat eqqartuussivillu aalajangersimappat eqqartuussinermut inatsimmi § 359 malillugu angerlarsimaffimi paaqqinniffimmiluunniit naleqquttumi inissinneqassasoq, tak. § 361, imm. 2, nr. 3-lu.
- 3) Meeraq eqqartuussinermut inatsimmi kapitali 30 malillugu isertitsivimiittussanngorlugu nakkutigineqartussanngorlugulu eqqartuunneqarsimappat, eqqartuussinermut inatsimmi kapitali 31 malillugu isertitsivimmut inissinneqartussatut eqqartuunneqarsimappat imaluunniit eqqartuussinermut inatsimmi kapitali 32 malillugu inuusuttunut pinerluuteqartartunut immikkut ittunik ikorsiissutigineqartartunik ikiorserneqarnissamut eqqartuunneqarsimappat.

Imm. 3. Kommunimi meeqqap tigusarineqarnerata tigummigallarneqarneratalu nalaani najugaqarfigisaani kommunalbestyrelse, pisuni imm. 2, nr. 1-imi aamma nr. 2-mi allassimasutut, piaarnerpaamik, kingusinnerpaamilli akunnerit 72-it iluanni, tigumminnikkallartussanik isumannangitsutut politiinit nalilerneqartunik pissarsiniassaaq.

Imm. 4. Kommunalbestyrelse immikkoortortamut isumannaallisakkamut inissiinissamik aalajangiissaq imm. 2, nr. 3-mi taaneqartut tunngavigalugit. Kommunalbestyrelsip pisuni pineqartuni inissiinerup sivissussisaa suullu malinnejqarsinnaanerat pillugit aalajangiissaq, tak. Pinerluttulerinermut Inatsimmi § 153. Kommunimi meeqqap tigusarineqarnerata tigummigallarneqarneratalu nalaani najugaqarfigisaani kommunalbestyrelse tassaassaaq piginnaasutut isigineqartussaq.

Ilaqutariit paarsisartut

§ 37. §§-it 27 imaluunniit 28 malillugit kommunip aaqqissugaanik meeqqat ilaqtariinnut paarsisartunut, tassunga ilanggullugit inuussutissarsiutigalugu nalinginnaasumillu ilaqtariinnut paarsisartunut inissinneqarsimasinnaapput.

Imm. 2. Ilaqutariit paarsisartut imm. 1 malillugu kommunimi ilaqtariit paarsisartut najugaqarfigisaanni kommunalbestyrelsip atsiugaanik allaganngorlugu paarsisuunissamut akuersissummik peqassapput, ilaqtariillu paarsisartut § 8, imm. 3 malillugu kommunimit nakkutigineqassapput.

Imm. 3. Kommunalbestyrelsip inissiisuuusup, meeqqap ilaqtariinnut paarsisartunut inissinneqarneranut akisussaasup, ilaqtariit paarsisartut meeqqalluunniit qinnuteqarnerata kingorna, aalajangersinnaavaa meeqqap ilaqtariinnit paarsisartunit inissiiffissamut allamut nuutsinneqannginnissaa, meeqqap ilaqtariinni paarsisartuni inissisimanera meeqqamut pitsaanerpaatut isigineqartariaqarpas, tak. § 2. Ammattaaq aalajangiivigineqarsinnaavoq meeqqap angajoqqaatut oqartussaassuseqartunut angerlartinneqannginnissaa, meeqqap ilaqtariinni paarsisartuni inissisimanera meeqqamut pitsaanerpaatut isigineqartariaqarsorinarpas, tak. § 2.

Imm. 4. Angajoqqaani aappaa kisimi angajoqqaatut oqartussaassuseqarsimappat aamma angajoqqaap aappaani meeraq ilaqtariinni paarineqartutut inissinneqarsimappat imm. 2- 3-milu malittarisassat atuutissanngillat.

Imm. 5. Ilaqtariinnut paarsisartunut akuersissummi piumasaqaatit atuukkunnaarsimappata ilaqtariinnut paarsisartunut akuersissut kommunalbestyrelsimit utertinneqassaaq.

Imm. 6. Ilaqtariinnut paarsisartunut akuersissutip saniatigut meeqqat inissinneqarsimasut tamarmik immikkut paarineqarnissaannut akuersisummik communalbestyrelse inissiisuuusoq ilaqtariinnut paarsisartunut atulersitsissaq. Tamanna kommunip aaqqissugaanik ilaqtariinni paarsisartuni inissiinissaq sioqqullugu pissaaq, communalbestyrelsillu meeqqap inissinneqarnissaanik kissaateqartup meeqqap qanoq ikiorserneqartariaqartiginera ilaqtariillu paarsisartut meeqqanik qassnik isumassuisinnaassuseqarnerat isummerfigisimassavaa.

Imm. 7. Naalakkersuisut ilaqtariit paarsisartut pillugit malittarisassanik erseqqinnerusunik aalajangersaasinnaapput, soorlu:

- 1) ilaqtariinnut paarsisartunut piumasaqaatinik,
- 2) aanngajaarniutinut atuisimanermut misilitsinnej
- 3) ilaqtariit paarsisartut sulineranni atugassarititaasunik, aningasanut tunngatillugu atugassarititaasut ilanngulligit, soorlu akissarsianut tunngasut il.il.
- 4) ilaqtariinnut paarsisartunut akuersisummik tunniussinissamut utertitsinissamullu piumasaqaataavq, matumani inuit 15-it sinnerlugit ukiullit tamarmik ilaqtariinni paarsisartuniittut meeqqanik pinerliisimanginnerannut pinerluuteqarsimanginnermullu uppernarsaatnik pigisaqassasut.
- 5) communalbestyrelsip ilaqtariinnut paarsisartunut akuersissutinik atulersitsinnginnermini paassisutissat suut pissarsiarisassanerai,
- 6) ilaqtariinnut paarsisartunut akuersisummi paassisutissat suut allassimassanersut,
- 7) meeravissiartaarnissaq siunertaralugu ilaqtariinnik paarsisartunik pilersitsinermi pissutsit pillugit malittarisassat immikkut ittuusinnaapput, aamma
- 8) Qaniganut inissiineq

§ 38. Kommunalbestyrelsip kommunip aaqqissugaanik ilaqtariit paarsisartut meeqqanik ataasiakkaanik inissiinissaq sioqqullugu paarsisutut suliassanut sukumiisumik paassisutissinneqarluarsimanissaat qulakkiissavaa. Kommunip aaqqissugaanik ilaqtariit paarsisartut meeqqap inissinneqarneranut tunngaviusumik iliuusissanut pilersaarutip assileqqinneranik tunineqassapput, tak. § 46.

§ 39. Angajoqqaatut oqartussaassusillip meeraq allamut namminiungitsumi najugaqartissimappagu nammineq aaqqissuussamik ilaqtariinni paarsisitsinerusimassaqq pisortanit aningasarsiartaqanngitsoq.

Imm. 2. Nammineq aaqqissuussamik ilaqtariit paarsisut meeraq ulloq unnuarlu qaammatit tulleriiginnaat aaqqaneq-marlk iluini qaammatinik pingasunik sivisunerusuni tigummissanngilaat kommunemi ilaqtariit paarsisartut najugaanni communalbestyrelsimit meeqqanik ataasiakkaartunik paarsinissamut akuersisummik pigisaqaratik.

Imm. 3. Paarsinissamut akuersissut taamaallaat tunniunneqarsinnaavoq ilaqtariinnik paarsisartunik misissuinerup kingorna inissiinissaq meeqqamut iluaqtaasussatut ilimagineqaraangat.

Imm. 4. Kommunalbestyrelsip kommunimi meeqqanik nalinginnaasumik nakkutilliinermi ilaatut, tak. § 8, imm. 1, meeqqallu nammineq aaqqissuussamik ilaqtariinnut paarsisartunut inissinneqartut paarineqarnissamik akuersissutillit nakkutigisassarai.

Imm. 5. Angajoqqaaviit, angajoqqaatut oqartussaaffimmik tigumminningitsut, aalajangersakkami pineqanngillat.

Imm. 6. Naalakkersuisut ukununnga ersarinnerusunik malittarisassiorsinnaapput:

- 1) Kommunalbestyrelsen ilaqtariinnut paarsisartunut akuersisarnerinut atorunnaarsitsisarnerinullu

- 2) Paasissutissat suut kommunalbestyrelsip pissarsiarisimasariaqarai ilaqtariittut paarsisartutut akuersinnginnermi, aamma
- 3) Paasissutissat suut paarsaqarsinnaanermut akuersissummi takuneqarsinnaassanersut.

Kapitali 11

Ikorsiinissamik suliniuteqarnerit suliniuteqareernermilu malitseqartitsinerup unitsinneri

Ikorsiinermi suliniutit unitsinneqarneri

§ 40. Ikorsiinissamik suliniuteqarnerit, ikorsiinissamillu suliniuteqarnerit immikkut ittut kiisalu ikorsiinissamik suliniuteqarnerit sukannernerit, tak. kapitalini 7-9-ni aalajangersakkat, kiisalu tamakku pillugit suliniuteqareernermi malitseqartitsilluni suliniutit unitsinneqassapput, taakku malillugit sulinermi anguniarneqartut anguneqarpata, imaluunniit ikorsiinermik suliniuteqarnikkut siunertarineqartut tunngavissaarukkaangata.

Imm. 2. Inatsisartut inatsisaat una malillugu ikorsiinissamik suliniuteqarnerit kommunalbestyrelse suliniuteqareernermi malitseqartitsinissamik aallartitsisoqarnissaanik aalajangiinngippat, unitsinneqassapput meeraq 18-inik ukioqalerpat takuu § 42.

§ 41. Angerlarsimaffiup avataani inissiinerup atorunnaarsinnissaa pillugu kommunalbestyrelsip aalajangiinissaa sioqqullugu, kommunalbestyrelsip qulakkeersimassavai:

- 1) angajoqqaatut oqartussaassusillip, ilatigut Inatsisartut Inatsisaat una malillugu, ikiuinissamik suliniuteqarfingineqarluni meeqqap pisariaqartitaanik naammassinnissinnaanera,
- 2) meeqqamik oqaloqatiginnittoqarsimanera, tak. § 43,
- 3) inissiiffiusumit allaganngorlugu oqaaseqaammik pissarsiniartoqarsimanera,
- 4) meerqqap angajoqqaallu angerlartitsinissamut piareersarluqarsimanerat, aamma
- 5) § 46 naapertorlugu angerlartitsinissamut iliuusissanut pilersaarusiortoqarsimanera kiisalu meeqqap angajoqqaatullu oqartussaassusillip piffissami angerlartitsinerup siuninngua kingornalu meeqqap attaveqarfigisartagarisimasinnaasaasa ikiorserneqarnissaannik piareersaasoqarsimanera.

Imm. 2. Kommunalbestyrelsip inissiinerup unitsinnissaanut tunngatillugu aalajangiinnginnermini akisussaaffiga inissiiffimiit allaganngorlugu oqaaseqaammik pissarsiniartoqarsimanissa, tak. imm. 1, nr. 3. Inissiiffiup oqaaseqaammini inassutigippagu meeqqap inissiiffigisaminiiqinnarnissaa kommunalbestyrelsip Meeqqat Pillugit Paasisimasalittut Qitiusumik Ataatsimiitsitaliap allattoqarfia ilisimatissavaa. Meeqqat Pillugit Paasisimasalittut Qitiusumik Ataatsimiitsitaliap allattoqarfia aalajangersinnaavaa suliassaq Meeqqat Pillugit Paasisimasalittut Qitiusumik Ataatsimiitsitaliamut oqaaseqarfigisassanngorlugu saqqummiunneqassanersoq, tak. § 53.

Imm. 3. Angerlartitsinissaq pisinnaanngilaq meeraq, angajoqqaatut oqartussaassusilik inissiiffillu minnerpaamik sapaatit akunnerinik aqqaneq-marlunnik sioqqutsilluni nalunaarutigisimangikkaanni, angerlartitsisoqarsinnaavorli meeqqap eqqarsaatiginera allalluunniit pingaarutillit eqqarsaatignerat pissutigalugit sioqqutsilluni ilimasaaruteqarnissap killissaanik saneqqutsisariaqalersitsillugu.

Imm. 4. Kalaallit Nunaata avataani inissiisoqarsimatillugu, inissiinerup unitsinneqarnissaal pillugu aalajangiinissaq sioqqullugu, nunami allami kommunimit najugaqarfigisamit allaganngorlugu nassuaammik kommunalbestyrelse sapisngisamik pissarsiniassaaq.

Inuuusuttunut 18-iiinit 23-t ilanngullugit ukiulinnut suliniuteqareernerimi malitseqartitsilluni suliniuteqarneq

§ 42. Kommunalbestyrelsip inuusuttut 18-init 23-t ilanngullugit ukiullit 18-iniliinerminni kapitalini 7-9-ni allassimasut malillugit ikorsiinissamik suliniuteqarfingineqartut suliniuteqareernermi malitseqartitsilluni suliniuteqarnissamik neqeroorfigineqassanersut aalajangiiffigissavai.

Imm. 2. Kommunalbestyrelse suliniuteqareernermi malitseqartitsilluni suliniuteqarnissamik inuuasutup ingerlalluarneranut, peqqissusaanut ineriantorneranullu annertuumik pingaruteqartutut isigineqarpat neqerooruteqassaaq.

Imm. 3. Kommunalbestyrelsip inuuusuttunut 18-init 23-t ilanngullugit ukiulinnut suliniuteqareernermi malitseqartitsilluni suliniuteqarnissap neqeroorutigineqarsinnaanera neqeroorutigineqaqqissinnaanera aalaijangiiffigisinnavaa:

- 1) inuuusutup suliniuteqareernermi malitseqartitsumik suliniuteqarfingineqarnissamik siusinnerusukkut itigartitsisimanini peqqissimmissutigippagu sulilu pisariaqartitsilluni paasippagu,
 - 2) inuuusutup inissismanera allannguuteqarsimappat, taamaallilluni kingusinnerusukkut suliniuteqareernermi malitseqartitsinissaq pisariaqartinneqalerluni, imaluunniit
 - 3) suliniuteqareernermi malitseqartitsineq unitsinneqarsimappat, tak. § 40, tamannalu pisariaqartinneqaqqilerluni.

Imm. 4. Suliniuteqareernermi malitseqartitsineq tassaasinnaavog:

- 1) § 22 naapertorlugu tapersersorteqartitsineq attaveqarfigisartagaqartitsinerlu.
 - 2) kapitali 7-9-ni taaneqartut ikorsiinissamik suliniuteqarnerit, imaluunniit
 - 3) ikorsiinnerit allat Inatsisartut inatsisaat una malillugu naapertuuttut inuusuttup nammineerluni inuuneqalernissaanut pitsasumik jkaarsaarijernerput tapertaasussatut siunertaqartut.

Imm. 5. Inuuusuttoq angerlarsimaffiup avataanut inissinneqarsimappat §§-it 27 imaluunniit 28 malillugit suliniuteqareernermermi malitseqartitsineq aamma tassaasinnaavoq maannakkut inissinneqarfigisami allamiliunniit naaleqqunnerusumi ulloq unnuarlu najugaqartinneqartoq.

Imm. 6. Suliniuteqareernermi malitseqartitsineq neqeroorutigineqassanersoq nalilorsorumallugu, meeqqap 18-inik ukioqalernissaa kingusinnerpaamik qaammatinik arfinilinnik sioqqullugu kommunalbestyrelsip meeraq attavigissavaa.

Imm. 7. Suliniuteqareernermermi malitsegartitsineq pillugu maleruagassanik erseqqinnerusunik Naalakkersuisut aalajangersaasinnapput, tassunga ilanggulligit suliniuteqareernermermi malitsegartitsinerup annertussusissaa, sivisussusissaa qanorlu isikkogarnissaa.

Kapitali 12

Sulianik suliarinninnermi malittarisassat

Meeggamik ogaloqatiginninnek

§ 43. Kapitalini 7-9-ni aalajangersakkat naapertorlugit meeqqamik ikorsiinissamik suliniuteqarnernik kiisalu kapitali 11-mi aalajangersakkat naapertorlugit ikorsiinissamik suliniuteqarnernik unitsitsinissanik aalajangiiqoqalersinnagu, meeraq ogaloqtigineqaqqaassaaq.

Imm. 2. Meeqqamut pitsaanerpaasussaq orniginarpat, ogaloqateqarneq angajooqqaatut oqartussaaq

akuersiteeqqaarnagu najuutsinnaguluunniit pisinnaavoq.

Imm. 3. Oqaloqatigiinnissaq pingitsoortinneqarsinnaavoq meeqqap perorsimassusia imaluunniit oqaloqatigiinnerup ingerlanneqarnissaanut suliap qanoq ittuunerata aalajangiisumik oqaloqatigiinnissaq piisanngitsutut isikkoqartippagu. Oqaloqatigiinneq naammassineqarsinnaanngippat, aalajangiinissatut eqqarsaatigineqartumut meeqqap isumaa allatut iliornikkut pissarsiariniarneqassaaq.

Imm. 4. Naalakkersuisut meeqqat pillugit sulianik suliarinninneq pillugu maleruagassanik erseqqinnerusunik aalajangersaasinnaapput, ilaatigut makku pillugit:

- 1) meeqqamik oqaloqateqarneq,
- 2) meeqqat pillugit suliani oqartussat akornanni paasissutissanik paarlaasseqatigiinneq, aamma
- 3) suliamik suliarinninnermut attuumassuteqartut pissutsit allat.

Meeqqanik illersuisoq

§ 44. Kommunalbestyrelsip suliarinninneranut atatillugu meeqqap ikiorserneqarnissaanut suliniuteqarnermik aallartitsinermi, meeqqap meeqqanik illersuisumit ikorneqarnissaa neqeroorutigisinnaavaa. Suliap suliarineqarnerata nalaani meeqqanik illersuisup meeqqap pisinnaatitaaffinik qulakkeerinninnissaq meeqqallu tusarneqarnissaa peqataaffigissavai. Meeqqanik illersuisup meeqqat atugaat suliamigut immikkut paasisimasaqarfingissavai imaluunniit meeqqanik illersuisussatut pikkorissarsimassalluni. Meeqqanik illersuisussamik toqqaaneq angajoqqaatut oqartussaassusilimmit akuerineqqaartariaqanngilaq.

Imm. 2. Meeqqat angajoqqaatut oqartussaassusilimmit akuerineqanngitsumik angerlarsimaffiup avataanut inissinneqartut, tak. § 28, meeqqanik illersuisulerneqartassapput.

Imm. 3. Meeqqat ulloq unnuarlu angerlarsimaffimmi immikkoortortaqarfimmumt isumannaallisakkamut inissinneqartussatut eqqarsaatigineqartut inissinneqareersimasulluunniit, meeqqanik illersuisulerneqartassapput.

Imm. 4. Meeqqanik illersuisup illersuisutut atorfininnerminut atatillugu pissutsit immikkut ittut pisariaqartitsippata meeqqanik pinerliisimannginnermut upernarsaammik pinerluuteqarsimamannginnermullu upernarsaammik pissarinissamut akuersissuteqarsinnaanngorlugu pisussaaffilerneqassaaq.

Imm. 5. Naalakkersuisut toqqaanissamut, akissarsiaqartitsinissamut, meeqqanut pinerluuteqarsimamannginnermut pinerlussimannginnermullu upernarsaammik aallernissamut, piukkunnaateqarnermut piginnaasanullu piumasaqaatinik qanoq ittunik meeqqanik illersuisumut piumasaqaataasussat pillugit malittarisassiussapput, tak. imm. 1. Ikorsiinerup qanoq ingerlanneqarnissaa pillugu maleruagassanik erseqqinnerusunik kiisalu nakkutiliinermut piumasaqaatit pillugit maleruagassanik erseqqinnerusunik Naalakkersuisut aalajangersaasinnaapput.

Isumaginninnikkut misissuineq

§ 45. Kommunalbestyrelse isumaginninnikkut misissuinermik suliaqassaaq meeraq immikkut ittumik ikiorserneqartariaqartutut isumaqarfingineqarpat, meeqqap atugai pillugit. Isumaginninnikkut misissuineq sapinngisamik meeqqap angajoqqaavi isumaginnittulluunniit allat meerarlu suleqatigalugit ingerlanneqassaaq. Pissutsit aallaavigalugit misissuineq sapinngisamik qajassuussisumik

ingerlanneqassaaq, siunertarineqartumillu annertunerussanani.

Imm. 2. Kommunalbestyrelsip isumaginninnikkut misissuinermit suliaqarnermut atatillugu tulliuttut nalilersussavai meeqqap atugaani pissutsit ataatsit arlallilliunniit allattorneqartuni tulliusuniittut pisariaqartissimannngippassuk:

- 1) Meeqqap pissusilorsornera, peroriartornera ineriartorneralu.
- 2) Meeqqap ilaqtariinni atugarisai, tassunga ilanngullugit ilaqtariit attaveqarfilla katitigaaneri.
- 3) Meeqqap ulluunerani paaqqinnettarfimmut atuarneranulluunniit tunngasut.
- 4) Meeqqap peqqissutsimigut atugai.
- 5) Meeqqap sunngiffimmi atugarisai ikinnguteqarneralu.
- 6) Pissutsit attuumassuteqartut allat.

Imm. 3. Isumaginninnikkut misissuineq iliuusissanik pilersaarummik allaganngorlugit tunngavilersukkamik kinguneqassaaq, tak. § 46, tassani allassimassapput ikorsiineq qanoq ittoq aallartinneqassanersoq. § 28 naapertorlugu nalilerneqarpat meeraq angerlarsimaffiup avataanut inissinneqartariaqartoq Suliassaqarfiit akimorlugit suleqatigiissitap suliap communalbestyrelsimi aalajangiiffigineqannginnerani pissutsit immikkut ittut atuutinngippata naliliineq allaganngorlugu nalunaarutigissavaa.

Imm. 4. Ikiuigallarnissamik aallartitsisoqarpat, isumaginninnikkut misissuinerup naammassineqarneranut atatillugu kommunalbestyrelsip ikiuigallarneq ingerlateqqinnejqassanersoq unitsinneqassanersorluunniit pillugu isummissaaq. Tamatumunnga atatillugu meeqqap angajoqqaatullu oqartussaassusillip ikiuinermut qanoq isummersimanerat eqqarsaatigineqassaaq.

Imm. 5. Inatsit alla malillugu meeraq ikiorserneqarsimappat, soorlu innarluutilinnut ikorsiineq pillugu inatsit malillugu, tamakkununnga tunngasut kommunalbestyrelsip isumaginninnikkut misissuinermut ilanngutissavai, isumaginninnikkullu misissuinerup ilaatut meeqqap ikiorserneqarnissamik pisariaqartitsineranik tamakkiisumik nalilersuisoqassaaq, soorlu meeqqap innarluuteqarneranik tunngaveqartumik ikiorserneqartariaqarneq. Inatsisartut inatsisaat una aallaavigalugu inatsit alla malillugu ikorsiisinnaaneq taamaalilluni meeqqap ikiorserneqarnissamik pisinnaatitaaffinik killiliinngilaq.

Imm. 6. Kommunalbestyrelse isumaginninnikkut misissuineq tunngavigalugu ikorsiinissamik aallartitsisoqarnissaanut tunngavissaqarnersoq aalajangiissaaq.

Imm. 7. Isumaginninnikkut misissuineq pillugu maleruagassanik erseqqinnerusunik Naalakkersuisut aalajangersaassapput, tassunga ilanngullugit misissuinerup ingerlanneqarnera, ilusaa imarisala pillugit kiisalu isumaginninnikkut misissuinerup suliarineranut naammassineqarnissaanullu piffissaliuussinermik piumasqaarneq.

Iliuusissatut pilersaarutit

§ 46. Kommunalbestyrelsi meeqqamut iliuusissanut pilersaarummik allaganngorlugu suliaqassaaq:

- 1) isumaginninnikkut misissuinermut atatillugu, tak. § 45,
- 2) ikorsiinissamik suliniuteqarnernik aallartitsisoqarnissaanik aalajangiisoqartinnagu, tak. §§ 21 aamma 25, aamma inissiinissaq pillugu, tak. §§ 27 imaluunniit 28,
- 3) angajoqqaanngortussanut ikorsiinissamik suliniuteqarnernik aallartitsisoqarnissaanik aalajangiisoqartinnagu, tak. aamma § 26,
- 4) ikorsiinerit unitsinneqarnissaannik aalajangiisoqartinnagu, tak. §§ 21aamma 25, kiisalu

suliniuteqareernermermi malitseqartitsineq, tak. § 40, aamma

5) suliniuteqareernermermi malitseqartitsinissamik aallartitsisoqarnissaa pillugu aalajangiisoqartinnagu, tak. § 42.

Imm. 2. Iliusissanut pilersaarut;

1) inummut ataatsimut tunngassaaq ikorsiinissamullu suliniuteqarnermut siunertaasoq allassimassalluni.

2) Isumaginninnikkut sullissinermi misissuinerit inernerannik iliuusissanut pilersaarut aallaaveqassaaq, tak. § 45.

3) Isumaginninnikkut sullissinermi misissuinermi ajornartorsiutinut paasineqartunut tunngatillugu meeqqap ingerlalluarneranut ineriarorneranullu tunngasunik iliuusissanut pilersaarut ersarissunik anguniagalersugaassaaq.

4) Iliuuseqarnerup qanoq sivisutiginissaanik naatsorsuutiginninneq, pissutsit meeqqamut tunngasut immikkut ittut, tassunga ilanngullugit katsorsaaneq, ilinniartitaaneq il. il., kiisalu suliniuteqarnerup ataavartumik communalbestyrelsimit qanoq nalilersuiffingeqartarnera aamma iliuusissanut pilersaarut qaugu kingullermik nalilersuivigineqassanersoq.

Imm. 3. Inatsit alla malillugu meeraq ikiorserneqarsimappat, soorlu inunnut innarluutilinnut ikorsiined pillugu inatsit malillugu, tamakkununnga tunngasut communalbestyrelsip iliuusissanut pilersaarummut ilanngutissavai.

Imm. 4. §§ 27 imaluunniit 28 malillugit angerlarsimaffiup avataanut inissiisoqarsimappat, iliuusissanut pilersaarummi inissiinermut siunertaasoq inissiinermilu anguneqartussatut naatsorsuutigineqartut allassimassapput.

Iliusissamik pilersaarutip imarissavai:

1) Angerlarsimaffiup avataanut inissiinermi aamma piffissami meeqqap angerlarsimaffiup avataaniinnerani piffissamilu meeqqap angerlareernerata kingorna, meeqqap angerlarsimaffiani isumassuinikkut avatangiisit nukittorsarnissaannut ikueriaatsit suut immikkut communalbestyrelsimit pilersinneqartussatut naatsorsuutigineqarnersut

2) meeqqap angajoqqaaminut isumassuisuminullu qanigisaminut aalajangersimasumik inuttut attaveqarnissaa imaluunniit atassuteqarnissaa qanoq ililluni qulakkeerneqassanersoq allaaserineqassaaq, tamanna pissaaq meeqqamut ajoqtaassangitsutut nalinerneqarpat.

Imm. 5. Angerlarsimaffiup avataanut inissiinermi inissiiffiusup iliuusissanut pilersaarummik tunineqarnissaa communalbestyrelsip isumagissavaa.

Imm. 6. Iliuusissanut pilersaarut angajoqqaatut oqartussaassusillip allalluunniit isumaginnittuusut meeqqallu oqaloqatiginerisigut suleqatiginerisigullu sapinngisamik suliarineqassaaq.

Imm. 7. Meeraq iliuusissanut pilersaarummi pineqartoq, angajoqqaatut oqartussaassusilik allalluunniit isumaginnittuusut iliuusissanut pilersaarummik ilisimatinneqassapput.

Imm. 8. Naalakkersuisut iliuusissanut pilersaarutit qanoq isikkoqarnissaat imaqarnissaallu pillugit ersarinnerusunik malittarisassiussapput, kiisalu pilersaarutip inissiiviusumut ingerlateqqinnejarnissaa pillugit.

§ 47. Kommunalbestyrelsip iliuusissanut pilersaarutip minnerpaamik ukiumut ataasiarluni iluarsineqartarnissaa qulakkiissavaa.

Imm. 2. Kommunalbestyrelsip piaernerpaamik aammalu imm. 1-imi aalajangersagaq apeqquaatinnagu,

iliusissamut pilersaarummut attuumassuteqartunik meeqqap atugaani allanngortoqarpat iliusissanut pilersaarummik iluarsiissuteqassaaq.

Katsorsaanissanut pilersaarutit

§ 48. Ulloq unnuarlu paaqqinniffit, meeqqamut inissinneqartumut iliusissanut pilersaarut aallaavigalugu, minnerpaamik ukiumut ataasiarlutik katsorsaanissamik pilersaarusiortassapput. Katsorsaanissamik pilersaarutip, inissiinermut iliusissanut pilersaarummi siunertaasut anguniagaasullu aallaavigalugit katsorsaanissamut pilersaarutip piumasaqaataasa angunissaannik qulakkeerinnittunik perorsaanikkut katsorsaanikkullu suliaqarnissat allaaserissavai.

Imm. 2. Meeqqanut ulloq unnuarlu paaqqinniffinnut inissinneqarsimasunut iliusissanut pilersaarutit qanoq isikkoqarnissaat qanorlu imaqarnissaat pillugit Naalakkersuisut ersarinnerusunik malittarisassiussapput.

Killiffit pillugit nalunaarusiat

§ 49. Ulloq unnuarlu paaqqinniffit kommunalbestyrelsip inummut sammititamik § 8, imm. 2 malillugu nakkutilliineranut atugassanik, meeqqap ulloq unnuarlu paaqqinniffimmi inissisimanerata nalaani ineriarorneranik kommunalbestyrelse ilisimatittassavaat. Meeqqap peqqissutsimigut inooqataanermigulluunniit atugaani allanngortoqarniariarpat imaluunniit annertuunik allanngortoqarnissaanik ilimanartoqarpat ulloq unnuarlu paaqqinniffiup kommunalbestyrelse ilisimatissavaa.

Imm. 2. Ulloq unnuarlu paaqqinniffik killiffik pillugu nalunaarusiusaaq, taannalu ulloq unnuarlu paaqqinniffimmut inissiinerup kingorna kingusinnerpaamik qaammatit pingasut qaangiunnerini kommunalbestyrelsimit nassutiissallugu, tamatumalu kingorna ukiumut marloriarluni nassiuassisassalluni. Killiffik pillugu nalunaarusiaq meeqqap iliusissanut pilersaarutaanut katsorsarneqarnissaanullu pilersaarutaanut naleqqiullugu meeqqap ingerlalluarnera ineriarorneralu pillugit paasissutissanik imaqassaaq.

Imm. 3. Meeqqanut ulloq unnuarlu paaqqinniffinnut inissinneqarsimasunut killiffit pillugit nalunaarusiat qanoq isikkoqarnissaat qanorlu imaqarnissaat pillugit Naalakkersuisut ersarinnerusunik malittarisassiussapput.

Akuersineq

§ 50. Kommunalbestyrelsi angajoqqaanngortussanit imaluunniit angajooqqaatut oqartussaassusilimmit meeqqamiillu, taanna 15-inik ukioqalersimappat, ikorsiinissamik suliniuteqarnissanik, tak. § 21, immikkut ittunik ikorsiinissanik, tak. § 25, imaluunniit ikorsiinissanik suliniuteqarnernik sukannererusunik, tak. § 27, taamaattoq tak. imm. 2, aalajangiisoqartinnagu, allaganngorlugu akuersisummit pissarsiniassaaq. Suliniuteqareernermermi malitseqartitsinermik, tak. § 42, aalajangiisoqartinnagu, kommunalbestyrelsi meeqqamat imaluunniit inuuusuttumit allaganngorlugu akuersisummit pissarsiniassaaq.

Imm. 2. Imm. 1-imi oqaaseqatigijit siullianni akuersisummit piumasaqarneq sanequnneqarsinnaavoq, ikorsiinissamik suliniuteqarnermik aallartitsinissaq meeqqap peqqissusaanut, ineriarorneranut

perioriartorneranullu annertuumik pingaarutilittut isigineqarpat kiisalu ikorsiinissamik suliniuteqarneq akuersisummik pissarsinngikkaluarluni anguneqarsinnaasutut isigineqarpat.

Imm. 3. Aalajangikkat, tak. § 6, angajoqqaatut oqartussaassusilimmik imaluunniit meeqqamit akuersisummik pisariaqartitsinngillat.

Siusissukkut pinaveersaartitsiniarluniluunniit sulinermi paasissutissanik paarlaasseqatigiinneq

§ 51. Atuarfik, atuareernermi ornittagaq, napparsimasunik paarsisut, peqqissaasut, nakorsat, kigutit nakorsaat kigutigissaasullu kommunip peqqissaaviani atorfekartut, ulluunerani neqeroorutit, sunngiffimmi ornittagaq oqartussaasullu meeqqanik atugarliortunik sullissinerup iluani suliassanik suliaqartartuuusut meeqqap inuttut ilaqtaminilu atugarisai, inummut namminermut tunngalluinnartut pillugit paasissutissat akunnerminni paasissutissiissutigisinnaavaat, paasissutisseeqatigiinneq meeqqat atugarliortut pillugit siusissukkut pinaveersaartitsiniarluniluunniit suleqatigiinnermut ata tillugu pisariaqartuuusorineqarpat.

Imm. 2. Meeraq aalajangersimasoq pillugu suliassami paasissutissanik paarlaasseqatigiinneq, tak. kapitalit 7-imiit 9-mut aamma § 42, ataatsimiinnermi ataasiartumik pisinnaavoq. Immikkut ittumik pisoqartillugu oqartussaasut suliffeqarfilla imm. 1-imi taaneqartut akornanni paasissutissanik paarlaasseqatigiinneq malitseqartitsilluni ataatsimiinnermi pisinnaavoq.

Imm. 3. Suliffeqarfait imminnut pigisut namminersortunilluunniit pigineqartut, katsorsaaviit namminersortut atuarfilluunniit namminersortut pisortat imm. 1-imi taaneqartut suliassaataannik suliaqartuuusut, akunnerminni aammalu pisortanut suliffeqarfinnullu imm. 1-imi taaneqartunut paasissutissanik imm. 1-imi taaneqartutuulli annertutigisumik paarlaasseqatigiissinnaapput.

Imm. 4. Oqartussaasut suliffeqarfilla imm. 1-imiit 3-mut malillugit paasissutissanik ingerlatitseqqiisinnaasut taamaaliornissaminnut pisussaaffeqanngillat.

Politiinut unnerluussisussaatitaasunullu paasissutissanik ingerlatitseqqiinerit

§ 52. Kommunini oqartussaasut meeqqanik inuusuttunillu atugarliortunik sullissinerup iluani suliassanik isumaginnituusut politiinut unnerluussisussaatitaasunullu meeqqap inuttut ilaqtaminilu atugarisai, inummut namminermut tunngalluinnartut, pillugit paasissutissanik ingerlatitseqqiisinnaapput, ingerlatitseqqiinneq meeqqat naapertuilluanngitsuliorfigineqarnissaannik pinaveersaartitsinermut atatillugu pisariaqarsorineqarpat.

Kapitali 13

Peqatigiiffit

§ 53. Malitassat ersarinnerusumik aalajangersakkat tunngavigalugit, peqatigiiffit meeqqanik suliaqarnerup iluani sammisaqartitsinernik aalajangersimasunik suliaqarnissani inunnik isumaginnitoqarfimmik suleqateqarnissaat Naalakkersuisut akuerisinnaavaat.

Kapitali 14

Meeqqat Pillugit Paasisimasalittut Qitiusumik Ataatsimiititaliaq

§ 54. Meeqqat Pillugit Paasisimasalittut Qitiusumik Ataatsimiititaliaq arfinilinnik ilaasortaqarpoq, tamarmik meeqqat pisariaqartitaannik ineriarornerinillu immikkut ittumik ilisimasaqartussat.

Ataatsimiititaliaq imatut katitigaassaaq:

- 1) 1 inatsisileritoog,
- 2) 1 tarnip pissusiinik ilisimasalik,
- 3) 1 inunniq isumaginninnermi siunnersorti,
- 4) 1 isumaginninnermi perorsaasoq,
- 5) 1 ilinniartitsisoq, aamma
- 6) 1 meeqqerisoq.

Imm. 2. Naalakkersuisut ataatsimiitsitaliamik ukiuni sisamani atuuttussamik pilersitsissapput.

Imm. 3. Ataatsimiititaliap suliassarissavaa meeqqap inissiffiusumiit anisinneqarnissa pillugu suliani oqaaseqaateqarnissaq, tak. § 41, imm. 2-mi oqaaseqatigiit aappaat.

Imm. 4. Naalakkersuisut ataatsimiititaliaq sinnerlugu allattoqarfimmik isumaginnissapput.

Imm. 5. Naalakkersuisut ataatsimiititaliap sulianik ingerlatitsisarnissaanut, suleriasissaanut, kiisalu ataatsimiititaliap ilisimasalinnik oqaaseqaatinik pissarsiniartariaqarsinnaaneranut erseqqinnerusunik malitarisassanik aalajangersaasinnaapput.

§ 55. Allattoqarfik Meeqqat Pillugit Paasisimasalittut Qitiusumik Ataatsimiitsitaliamut oqaaseqarfigisassangorlugu tunniussippat, tak. § 41, imm. 2, 2-mi oqaaseqatigiit aappaat, meeqqap ulloq unnuarlu paaqqinnittarfimmii angerlartinneqarnissa pillugu aalajangiisoqartinnagu ataatsimiitsitaliap oqaaseqaataanik tigusaqarnissani kommunalbestyrelsip utaqqigallassavaa.

Imm. 2. Kommunalbestyrelse inissiiffiusullu ataatsimiititaliap qinnuiginninneratigut qulakkiissavaat suliami paassisutissat pisariaqartinneqartut ataatsimiititaliamit tiguneqarnissaat, paassisutissat imarissavaat:

- 1) Meeraq pillugu suliami allagaatit.
- 2) Kommunalbestyrelsip angerlartitsinissaq pillugu inassuteqaataa.
- 3) Siusinnerusukkut iliuusissanut pilersaarutit, kiisalu katsorsaanissamik pilersaarutit killiffiusumullu nalunaarusiat.
- 4) Angerlartitsineq pillugu iliuusissanut pilersaarut nutaaq.
- 5) Suliassaqrifit akimorlugit suleqatigiissitap oqaaseqaataa.
- 6) Ulluunerani paaqqinnittarfimmii, atuarfimmii assigisaanniilluunniit oqaaseqaataasinnaasut.
- 7) Tarnip pissusiinik ilisimasalimmik, nakorsamik assigisaanniilluunniit oqaaseqaataasinnaasut.
- 8) Meeqqap angerlartinneqannginnissaanut inissiiffiusup tunngavilersuuta.
- 9) Angajoqqaatut oqartussaassuseqartumi meeqqap angerlarfissaatut kissaatigineqartumi atugassarititaasut pillugit allaaserinninneq.
- 10) Akuersissutit imaluunniit akuersissutip utertinneqarnera.
- 11) Attuumassuteqartut allat tamaasa meeraq pillugu paassisutissat ataatsimiitsitaliap pissarsiarerusutai.

Imm. 3. Suliaq tamakkiisumik ilisimatitsissutigineqarpat atortussallu tamarmik kalaallisut qallunaatullu allassimalerpata Meeqqat Pillugit Paasisimasalittut Qitiusumik Ataatsimiitsitaliap suliamut tunngatillugu oqaaseqaataasa tunniunneqarnissaannut sapaatit akunneri sisamat piffissarititaapput. Tunniussinissamut piffissarititaq ullut arfineq marluk sinnerlugin qaangerneqarpat Meeqqat Pillugit Paasisimasalittut

Qitiusumik Ataatsimiitsitaliap allattoqarfiata suliap suliarineqarnissaanut piffissaritinneqartoq nutaaq pillugu ilisimatitsissut communalbestyrelsiumut inissiiffiusumullu nassutiissavaa.

Kapitali 15

Akiliutit naleqqussarneqartarnerat aningaasalersornerallu

Aningaasalersuineq

§ 56. Inatsisartut inatsisaat una malillugu meeqqanik ikorsiinermut aningaasartuutit kommuninit akilerneqartassapput.

Imm. 2. Inatsisartut inatsisaat una malillugu inuuusuttunut suliniuteqareernermi malitseqartitsilluni ikorsiinermut aningaasartuutit kommuninit akilerneqartassapput.

Imm. 3. Meeqqat Pillugit Paasisimasalittut Qitiusumik Ataatsimiitsitaliamut aningaasartuutit Naalakkersuisunit akilerneqartassapput.

Imm. 4. Ulloq unnuarlu paaqqinniffinnik ingerlatsineq kommunip akigititaanik akiliinerit aqqutigalugit aningaasalersorneqassaaq, tak. § 57.

Imm. 5. Inatsisartut inatsisaat una malillugu Naalakkersuisut, kommunit paaqqinniffillu imminnut pigisut namminneq pigisassaminnik pilersitsinerminnut atasumik aningaasartuutit tamarmik immikkut akilertassavaat.

Imm. 6. Naalakkersuisut nunat allat ingerlatsinikkut oqartussaasuunik isumaqatigiissuteqarnermikkut Inatsisartut inatsisaat una malillugu ikorsiinernik aallartitsinernut aningaasartuutinut atatillugu iliuuseqartussaanermut akiliutinillu utertitsinissanut malittarisassanik aalaja-ngersaasinnaapput, meeraq inuuusuttorluunniit suliniuteqareernermi malitseqartitsilluni suliniuteqarfingineqartoq Kalaallit Nunaanni oqartussat ikuinissamik suliniuteqarnerisigut Kalaallit Nunaata avataanut inissinneqarsimagaangat.

§ 57. Meeqqanut ulloq unnuarlu paaqqinniffinnut inissinneqarsimasunut, tak. § 3, imm. 2, nr. 2 nr. 3-lu, kommunip akigititanut akiliutissaa naatsorsorneqassaaq ullut unnuarlu inissiiffiusut ataasiakkaarlugit.

Imm. 2. Ulloq unnuarlu paaqqinniffit meeqqanut inuuusuttunullu ulloq unnuarlu paaqqin-niffinnut inissinneqartunut suliniuteqareernermilu malitseqartitsilluni suliniuteqarfingineqartunut kaasarfimmussanik atisassarsiutissanillu tunniussisussaapput.

Imm. 3. Kaasarfimmunut atisassarsiutissanullu aningaasat annertussusaat kommunit akigititanut akiliutaannut ilanngunneqarput, tak. imm. 1.

Imm. 4. Imm. 1-imi taaneqartoq akigititanik akiliineq pillugu maleruagassanik erseqqinnerusunik Naalakkersuisut aalajangersaasinnaapput, tassunga ilanngullugit aningaasartuutit suut kommunip akiliutaanut ilaassanersut.

Imm. 5. Naalakkersuisut ulloq unnuarlu paaqqinniffit kommunimit akigititanik akiliiffingeqartartut tamaasa aningaasaqarnerannik nakkutiginissaat pisinnaatitaaffigaat.

Imm. 6. Imm. 2 malillugu kaasarfimmuit atisassarsiutissallu, tassunga ilanngullugit tunniunneri, aningaasat annertussusisaat aammalu ulloq unnuarlu angerlarsimaffimmi perorsaanermik suliaqarnerup ilaautt kaasarfimmussanik malittarisassioriornissamik Naalakkersuisut aalajangersaasinnaapput.

§ 58. Naalakkersuisut maleruagassanik sinaakkutissaat akilerneqartarnissaallu pillugit malittarisassanik erseqqinnerusunik aalajangersaasinnaapput, tak. § 30, imm. 2, nr 4.

Akiliutinik naleqqussaaneq

§ 59. Inatsisartut inatsisaat una naapertorlugu akit aalajangersaavigineqartut ukiumut ataasiarlutik naleqqussarneqartassapput. Akinik aalajangersaaneq ukiumut ataasiarluni januaarip aallaqqaataani Naalakkersuisunit tamanut saqqummiunneqartassapput.

Kapitali 16

Naammagittaalliuuteqarsinnaaneq

§ 60. Kommunalbestyrelsip Inatsisartut inatsisaat una malillugu aalajangigai, Isumaginnermi Naammagittaalliorfimmut naammagittaalliuutigineqarsinnaapput Isumaginnittoqarfuiup aqunneqarnera aqqissuunneqarneralu pillugit Inatsisartut peqqussutaanni aalajangersakkat malillugit.

Imm. 2. Inatsisartut inatsisaat una malillugu aalajangersakkat naapertorlugit aalajangiinernut, meeqqat suliani imminnut tunngasuni, tak. imm. 1, naammagittaalliorsinnaatitaapput.

Imm. 3. Meeqqap naammagittaalliorsinnaatitaanera pillugu maleruagassanik erseqqinnerusunik Naalakkersuisut aalajangersaasinnaapput.

Kapitali 17

Pineqaatissiisarnernut aalajangersakkat

§ 61. Naalakkersuisut communalbestyrelse pinngitsaaliissutnik akiligassissinnaavaat, tassunga ilaalluni ullormut akiliisitsineq, uppermarsineqarsinnaappat Inatsisartut inatsisaanni uani aalajangersakkat naapertorlugit communalbestyrelse oqartussaasutut pisussaaffimminik eqqortitsinissamik annertuumik sumiginnaasimappat sumiginnaasaqattaarsimappalluunniit imaluunniit mianersuaalliorsimappat.

Imm. 2. Inatsisartut inatsisaat una tunngavigalugu pinngitsaaliissummik akiliisinneqarnermi akiliutit Nunatta Karsianut nakkartinneqassapput.

Kapitali 18

Atortuulersitsineq ikaarsaarnermilu aalajangersakkat

§ 62. Inatsisartut inatsisaat una 1. Juli 2017-imi atuutilerpoq.

Imm. 2. Peqatigisaanik Meeqqanik inuusuttunillu ikorsiisarneq pillugu Inatsisartut peqqussaat nr. 1, 15. april 2003-meersoq atorunnaarpooq.

Imm. 3. Allaffissornikkut aalajangersakkat Inatsisartut peqqussutaanni imm. 2-mi taaneqartut tunngavigalugit aalajangersakkat aalajangersneqarsimasut, Inatsisartut inatsisaat una allalluunniit tunngavigalugit malittarisassianik taarserneqarnissamik atorunnaarsinnejarnissamilluunniit tungaanut atuutissapput.

Namminersorlutik Oqartussat, ulloq 26. juni 2017

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaquataasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviit

Naalakkersuisut